

太平寰宇記

第二十七冊

太平軍字記

卷之六

太平寰宇記卷之一百五

江南西道三

太平州

池州

太平州

太平州

理當塗縣

本宣州當塗縣周世宗畫江爲界之後

僞唐于縣立新和州又爲雄遠軍迨至開寶八年

平江南改爲平南軍太平興國二年升爲太平州

割當塗蕪湖繁昌三縣以隸焉

領縣三

當塗

蕪湖

繁昌

太平寰宇記 卷之一百五
州境

東西一百四十三里 南北二百五十七里

四至八到

東至東京陸路一千七百里水路二千三十里

西至西京陸路二千一百里水路二千八百五十里

西至長安三千一百二十里

東至昇州二百九十七里

西至和州五十二里江浙二里

浙當作詩

南至宣州一百九十三里

北至揚州四百里江浙八十里

東南至宣州丹陽湖口與宣州分界一百五十里
西南至池州四百一十里

東北至溧水一百二十里

西北至和州采石江心爲界二十八里

戶

舊戶載宣州籍

皇朝戶主一萬一千二百一十九客二千八百四十一

風俗

同宣州

人物

陶回

當塗人倡義兵與陶侃併力攻蘇峻封康樂伯

何琦

字萬倫繁昌人

土產

鮐魚

烏昧草

當塗縣

舊二十四鄉今十六鄉

本漢丹陽縣地漢以來為侯國

即漢書劉聖公為當塗侯是也按漢書地理志當

塗屬九江郡應劭注云禹所娶塗山侯國也有禹

墟春秋左氏傳云禹會諸侯于塗山在壽春楚之

分隸揚州晉太康二年分丹陽置于湖縣成帝時

以江北之當塗縣流人過江在于湖者僑立當塗

縣屬淮南郡故晉書郡國志云西晉愍懷之後胡
寇仍侵中原不守琅邪王睿出鎮揚州因渡江南
下金陵建大業衣冠禮樂州郡名號並隨渡江改
制則徙北地當塗來江南自東晉之始也金陵記
云姑孰之南淮曲之陽置南豫州六代英雄迭居
于此以斯地爲上游廣屯兵甲代築牆壘基址猶
存至隋平陳改南豫州爲宣州因廢于湖縣徙當
塗于姑孰大業二年以姑孰隸蔣州至三年廢蔣
州屬丹陽武德七年趙郡王孝恭平輔公祏之後
百姓凋殘萬中無一至八年四月以當塗縣仍舊

屬宣州 牛渚山在縣北三十五里突出江中謂
爲牛渚圻古津渡處也江表傳云司馬徽論運命
厯數云黃旂紫蓋見于東南終有天下者荆揚之
君子又壽春謠言天子當西上孫皓大喜卽載妻
子及後宮數千從牛渚陸道西上云青蓋入洛陽
適遇大雪寒凍殆死輿地志云牛渚山首有人潛
行云此處連洞庭旁通無底見有金牛狀異乃驚
怪而出牛渚山此謂之采石按今對采石渡口上
有謝將軍祠又按江源記云商旅于此取石至都
輪造石渚因名采石淮南記吳初以周瑜屯牛渚

晉鎮西將軍謝尚亦鎮此城袁宏時寄運船泊牛渚尚乘月泛江聞運船中諷詠遣問之卽宏誦其自作咏史詩于是大相歡賞慈母山在縣北七十里臨江亦謂之慈姥山丹陽記云山生簫管竹王褒洞簫賦云原夫簫幹之所生于江南之邱墟卽此處是也其竹圓緻異于他處自伶倫採竹嶰谷以後唯此簫見珍歷代嘗給樂府而俗呼爲鼓吹山山有慈姥祠采石戍名也在縣西北牛渚山之上最狹亦侯景東渡路由于此隋平陳置赭圻鎮貞觀初于此置戍連磯山山邊大江磯石

相連謝朓常于此賦詩也 琵琶山以山形相似

琵琶故以名 銅山山在縣南出好銅古謂丹陽

銅是也 翰辟山梁大同起居注云九年鴻臚卿

上表傳詔往姑孰翰辟山採石墨于大石之內獲

錢四枚 蘇屯山昔蘇峻屯于此山因以名之

蒲山在縣東六里按宋書孝武帝大明七年巡于

湖縣至蒲山獨赦南豫州卽此也 九井山在縣

南十里按伏滔北征記云九井山在丹陽山南有

九井五井乾四井通大江昔有人卸馬鞍乃從牛

渚得之卽知通江又姑孰記云殷仲文九日從桓

公遊九井賦詩卽此山也 黃山在縣西北五里
上有宋凌歊臺周迴五里一百步高四十丈石碑
見存 望夫山在縣西四十七里昔人往楚累歲
不還其妻登此山望夫乃化爲石周迴五十里高
一百丈臨江 龍山在縣南一十二里昔桓溫嘗
以九月九日與僚佐登此周迴一十五里 天門
山在縣西南三十里有二山夾大江東曰博望西
曰天門按郡國志云天門山亦云娥眉山楚獲吳
餘艫于此按其山相對時人呼爲東梁山梁山據
縣圖爲天門山輿地志云博望梁山東西隔江相

對如門相去數里謂之天門宋孝武詔曰梁山層
岫雲峙流間海岳天表象魏以旌國利仍以二山
爲立闕故云天門焉 謝公山在縣東三十五里
齊宣城太守謝朓築室及池于山南其宅堦址猶
存路南磚井二口天寶十二年改爲謝公山周廻
八十里 金牛渚在縣西北十里東方朔神異記
云有銅與金相似又云昔有金牛起于此山入牛
渚坎穴猶存 白紵山在縣東五里本名楚山桓
溫領妓遊山奏樂好爲白紵歌因改爲白紵山
鼉浦在縣南一里三百五十步李聿任歙州刺史

爲此浦有鼉魅領聿妻子往新安郡就任幽聿本
身于潭中三年聿從潭出往尋妻子妻子不復識
乃往山東學法後斬其鼉魅妻子乃識之 姑孰
溪在縣南二里姑孰卽縣名此水經縣市中過按
溪卽因地以名之也又按江源記姑浦口南岸立
津關譏禁行旅 謝朓宅在縣東南二十五里

司馬井在城南一十里九井皆晉司馬桓公所鑿

彭城昔吳楚交軍于此彭王所築因名焉 白

紆亭圖經云昔宋帝與羣臣會于此山遊唱白紆
歌因以爲名在縣東七十五里 司馬陵晉司馬

桓玄篡立僞尊爲陵今里人猶呼之碑闕俱在去
縣一十一里青陽東北隅又南史齊宜都王鏐爲
南豫州刺史鎮姑孰于時人發桓溫女冢得金巾
箱織金篋爲簾音匿器又有金蠶銀繭等物甚多條
以啟聞鬱林王勅以賜之鏐曰今取往物後取今
物如此循環豈可熟念使長史蔡約自往修復纖
毫不犯以上陵墓並在邑界

蕪湖縣

東北六十五里元七鄉

本漢縣地理志屬丹陽在蕪湖

側以其地卑畜水澶深而生蕪藻故曰蕪湖因此
名縣晉爲重鎮謝尚王敦皆鎮于此陳平縣廢地

入當塗其實爲江津之要區自唐武德以來爲鎮
隸姑孰僞唐割宣城當塗二邑之地復置隸昇州
國破還宣州今隸太平州 蕪湖長七里在縣界
春秋楚子伐吳克鳩茲杜注云在蕪湖今謂之皋
夷也 鼇洲按江表記云江中有鼇洲長三里與
蕪湖相接 楚干將墳在縣東北九里楚干將鑢
鉞之子復父仇三人以三人頭共葬在宣城縣卽
蕪湖也

繁昌縣

東北一百六十
五里元七鄉

本宣州南陵縣地在南陵之

西南大江西對廬州江口以地出石綠兼鐵由是

置冶自唐開元以來立爲石綠場其地理枕江舟
旅憧憧實津要之地以南陵地遠民乞輸稅于場
僞唐析南陵之五鄉立爲繁昌縣 靈山在縣南
十里山半有龍池泉水長流有龍堂每亢旱祈禱
有應 磕山在縣南大江中有石石上有寺舊名
孤圻山亦曰蜃居山在顧冶山上去縣一十五里

池州

池州池陽郡今理貴池縣禹貢揚州之域春秋及秦漢爲今宣

州之西偏古鄣郡之地三國志云吳黃武三年封
韓當爲石城侯乃置石城縣于此輿地志云梁昭

明太子以其水出魚美名爲貴池隋開皇九年廢
石城縣入南陵縣至十九年于廢石城置秋浦縣
屬宣城郡大業末爲賊汪華所守唐武德四年歙
州總管左難當奏于秋浦別置池州領南陵秋浦
二縣貞觀元年廢池州以秋浦屬宣州永泰元年
侍御史李芑一作芑巡撫至此時宣饒二郡人陳莊
方清聚兵據烏石山并太平等古城爲亂遂絕江
路劫掠行旅日久芑乃請以秋浦仍舊置州守其
要地以破其謀觀察使洪州都督李勉以聞代宗
嘉之乃以宣州之秋浦青陽饒州之至德三縣以